

- मुख्यमंत्री भजनलाल शर्मा प्रदेश की नौ नवी नीतियां की सुरुआत कीनी।
- केन्द्र सरकार प्रधानमंत्री आवास योजना रा तैत दो करोड़ 95 लाख मकान बनावण की मंजूरी दीनी।
- चूरू-हनुमानगढ़ मेगा हाईवे माथे व्हा हादसा मांय पांच जणां की मौत -दो जणा घणा जख्मी व्हा।
- नागौर मांय व्ही राइजिंग राजस्थान इन्वेस्टर मीट मांय सवा चार हजार करोड़ रुपया रा निवेश रा करार करी ज्या।

000

मुख्यमंत्री भजनलाल शर्मा राइजिंग राजस्थान इन्वेस्टमेंट समिट ऊं पैली प्रदेश की नौ नवी नीतियां की आज सुरुआत कीनी। पांच महकमां ऊं जुड़ी अ नीतियां प्रदेश मांय निवेश बधावण सारु खास काम करेला। ई मौके मुख्यमंत्री कह्यो के सरकार सगळां की राय ले र सोच-विचार कर र अ नीतियां बणायी है। वे कह्यो के नीतियां मांय उदारता अर सरलीकरण व्हेवणो चाहिजे।

ई मौके राख्यी ज्या कार्यक्रम मांय दोन्यू उपमुख्यमंत्री दीया कुमारी अर डॉ. प्रेम चंद बैरवा ई मौजूद हा। आज सुरु करी ज्यी नीतियां मांय राजस्थान एमएसएमई नीति, निर्यात संवर्द्धन नीति, एक जिला एक उत्पाद नीति, एकीकृत क्लस्टर विकास योजना, राजस्थान IT-ET - ग् नीति, पर्यटन इकाई नीति, एकीकृत स्वच्छ ऊर्जा नीति, खनिज नीति अर राजस्थान एम-सेण्ड नीति-2024 शामिल है।

000

प्रधानमंत्री आवास योजना-ग्रामीण रा तैत 38 लाख घर आवंटित करी ज्या है। ई सारु दस हजार छह सौ करोड़ रुपया ऊं बत्ती रकम जारी करी ज्यी ही। केन्द्रीय ग्रामीण विकास मंत्री शिवराज सिंह चौहान आज नई दिल्ली मांय खबरनवीसां सागे बातचीत करता थकां आ जाणकारी दीनी। वे कह्यो के हर गरीब इंसान ने पक्को घर मुहैया करावण सारु सरकार दो करोड़ 95 लाख मकान बनावण की मंजूरी दीनी है।

000

राष्ट्रपति द्रौपदी मुर्मू आयुर्वेद रा हलका मांय और शोध करण की जरूरत बतायी है। वे ओडिशा रा पुरी मांय गोपबन्धु आयुर्वेद कॉलेज रा 75वां स्थापना दिवस रे मौके राख्यी ज्या जळसा मांय बोल रही ही। वे कह्यो के आयुर्वेदिक ईलाज ऊं जूनी बीमारियां ई ठीक व्हे जावे है, ज्यी कारण देश मांय मोटी तादाद मांय लोग आज ई देशी ईलाज माथे भरोसो करे है। वे कह्यो के आयुष मंत्रालय देश मांय आयुर्वेद अर योग माथे जनता रो भरोसो बधावण सारु लगातार कोशिश कर रह्यो है।

000

रेल मंत्री अश्विनी वैष्णव आज लोकसभा मांय रेलवे संशोधन बिल 2024 पेश कीनो। वे कह्यो के बिल रो मकसद रेलवे हलका मांय और दक्षता लावणो है। वैष्णव कह्यो के 10 साल पैली रेलवे रो बजट करीब 29 हजार करोड़ रुपया हो, जो अब बढ र दो लाख 52 हजार करोड़ रुपया व्हे ग्यो है। रेलमंत्री कह्यो के लारला 10 साल मांय 44 हजार किलोमीटर रेलवे नेटवर्क ने बिजली की गाड़ियां चलावण लायक बणायी ज्यो।

0000

भारतीय अंतरिक्ष अनुसंधान संगठन-इसरो पीएसएलवी-सी-59 ऊं यूरोपीय अंतरिक्ष एजेंसी रा प्रोबा-3 उपग्रह ने अब काल छोड़ेला। श्रीहरिकोटा रा सतीश धवन अंतरिक्ष केन्द्र ऊं आज शाम चार बज र आठ मिनट परां इण ने छोड़णो हो, पण अंतरिक्ष यान मांय गड़बड़ी आवण रे कारण अब इण ने काल सिंज्या 4 बज र बारह मिनट परां छोड़णो तैय करी ज्यो है।

000

राज्यपाल हरिभाऊ बागड़े कह्यो है के भणाई-लिखाई सागे कौशल री सिखावण ई ज़रूरी है। वे आज जोधपुर मांय 16वां अंतरराष्ट्रीय वृत्तचित्र फिल्म महोत्सव रा उद्घाटन जळसा मांय बोल रह्या हा। वे कह्यो के विद्यार्थियां ने एक-दूजा ऊं बातचीत करणी चाहिजे, जिण ऊं अर्जित ज्ञान अर विचारां रो लेन-देन व्हेला। राज्यपाल कह्यो के सीईसी रे मार्फत शिक्षा रा डिजिटाइजेशन रा नुवा गेला खुल्या है, ज्यां ऊं आवता बगत मांय भारत तालीम रा हलका मांय और तेजी ऊं आगे चालेला।

000

केन्द्र सरकार 23 राज्यां मांय सैर-सपाटा री ठोड़ां रा विकास सारू 3 हजार 295 करोड़ रुपया रा खर्च वाळी 40 परियोजनावां मंजूर कीनी है। ई रा तहत जयपुर मांय आमेर, नाहरगढ़ अर आरे-सारे रा हलका रो विकास कर्यो जावेला। ई परियोजना माथे 49 करोड़ 31 लाख रुपया रो खर्च आवेला। खास तौर ऊं आमेर, नाहरगढ़ अर गैटोर री छतरियां ने जोड़बा वाळा पैदल गेला रो विकास कर्यो जावेला। ई सागे ई आमेर मांय आगंतुक परिसर ने ओजू विकसित करण, मावठा ने और बेहतर बणावण अर परियां रा बाग रा सुधार रा काम ई कर्या जावेला।

000

मुख्यमंत्री भजनलाल शर्मा उत्तरप्रदेश रा मुख्यमंत्री योगी आदित्यनाथ ने कुंभ रा मेळा मांय राजस्थान पैवेलियन लगावण सारू जमीं देवण री अरज कीनी है। वे ई बारा मांय उत्तरप्रदेश रा मुख्यमंत्री ने खत लिख्यो है। इण ऊं 13 जनवरी ऊं 26 फरवरी 2025 ताई भरण वाळा कुम्भ रा मेळा मांय जावण वाळा राजस्थान रा जातरुआं ने फायदो व्हेला। ई पैवेलियन मांय जातरुआं रा आराम, नाश्ता अर ईलाज समेत ज़रूरी व्यवस्थावां तैय करी जावेला।

000

कोटा रा अभेड़ा बायोलॉजिकल पार्क ऊं आज एक बाघ ने रामगढ़ विषधारी टाइगर रिजर्व मांय छोड़ी ज्यो। बाघ ने 5 हेक्टेयर रा एनक्लोजर मांय छोड़ी ज्यो है, जठै वां री देखभाल करी जावेला। चीफ वाइल्ड लाइफ वार्डन कानी ऊं हर तीन महीना मांय ई बाघ री रपट भेजी जावेला, ज्यीं पाछे इण ने खुला जंगल मांय छोड़्यो जावेला। ओ बाघ आवण ऊं रामगढ़ विषधारी टाइगर रिजर्व मांय बाघां री तादाद बध र 6 व्हे ग्यी है, ज्यां मांय दो नर, एक मादा अर 2 बच्चा शामिल हैं। ई उद्यान मांय मध्यप्रदेश ऊं एक और बाघिन लावण रो काम ई चाल रह्यो है।

000

चूरू जिला रा सरदारशहर मांय चूरू-हनुमानगढ़ मेगा हाईवे माथे आज तड़के व्ह्या एक सड़क हादसा मांय 5 जणां री मौत व्हेगी अर दो जणा घणां ज़ख्मी व्हे ग्या। बुकनसर फांटा कने हनुमानगढ़ री ओर ऊं आ रह्या कैटर अर कार री आमी-सामी टक्कर मांय कार मांय सवार लोग बुरी तरह फंस ग्या, ज्यां ने निकाळबा सारू क्रेन बुलाणी पड़ी। ज़ख्मी लोगां ने बीकानेर रैफर करी ज्यो है। कार मांय सवार लोग सरदारशहर ऊं हनुमानगढ़ ओड़ी जा रह्या हा। सवाईमाधोपुर जिला रा बौली हलका मांय दिल्ली मुंबई एक्सप्रेसवे माथे आज एक कार पलट जावण ऊं दो जणा री मौत व्हे ग्यी। एक ही पिरवार रा अ दोन्यू जणा गुरुग्राम रा रेहवासी हा।

000

झुंझुनू जिला रा नयासर गांव मांय सोमवार ने व्ह्या सड़क हादसा मांय मरण वाळा रा पिरवार वाळा न्यारी-न्यारी मांगां ने ले र भगवान दास खेतान अस्पताल रा मुर्दाघर रे बाहर धरनो दे रह्या है। वे एक करोड रुप्या रो मुआवजो अर पिरवार रा किण ई जणा ने सरकारी नौकरी देवण री मांग कर रह्या है। अ लोग शहर मांय भाड़ा माथे कार देवण रा गैर-कानूनी धंधा माथे तुरत रोक लगावण री मांग ई कर रह्या है।

000

नागौर मांय आज जिला स्तर रो राइजिंग राजस्थान निवेशक सम्मेलन राख्यी ज्यो। जिला उद्योग अर वाणिज्य केन्द्र रा महाप्रबंधक बजरंग सांगवा बतायो के सम्मेलन रे दौरान जिला रा खास कारखानां अर एमएसएमई कानी ऊं बणायी ज्या सामान री प्रदर्शनी ई लगायी ज्यी। कार्यक्रम मांय राज्यमंत्री डॉ. मंजू बाघमार ई शिरकत कीनी। वे कह्यो के मीट मांय नागौर जिला रा कारोबारी खूब उमाव सागे शिरकत कीनी।

000

जयपुर मांय 9 ऊं 11 दिसम्बर तांई व्हेवण वाळी राइजिंग राजस्थान ग्लोबल इन्वेस्टमेंट समिट री तैयारियां रा तहत नगर निगम जयपुर हेरिटेज क्विक रिस्पॉन्स टीम बणायी है, जो शहर री सफाई व्यवस्था तैय करण सारू लगातार काम करेला। ई टीम मांय 16 सफाई कर्मचारी शामिल करी ज्या है, जो ई आयोजन रा गेला माथे साफ-सफाई री निगराणी राखेला।

000

रेलवे कोटा रा सोगरिया अर नई दिल्ली बीचे चालण वाली एक्सप्रेस रेलगाडी काल ऊं रोजीना चलावण रो फैसलो कीनो है। आ गाडी ई साल 1 दिसम्बर ऊं 28 फरवरी 2025 तांई कोहरा री शंका रे कारण रद्द कर दीरीजी ही।

000

गृह राज्य मंत्री जवाहर सिंह बेदम आज डीग जिला रा नगर विधानसभा हलका री न्यारी-न्यारी स्कूलां मांय 2 करोड 45 लाख रुप्या रा खर्च ऊं बणाया जावण वाळा कक्षा-कक्ष रा काम री नींव रखी। ई मौके वे कह्यो के राज्य सरकार गांवाई हलकां रा बच्चां ने भणार्ई-लिखाई रा नुवा सुबीता मुहैया करा रही है। बेदम कह्यो के जनता रा भला री योजनावां रे मार्फत राज्य रा पढ्या-लिख्या कुशल नौजवानां सारू नौकरी-धंधा रा मौका ई मुहैया कराया जा रह्या है।

000